

摘藻堂四庫全書薈要

集部

欽定四庫全書薈要

集部  
中州集卷一


詳校官候選知縣臣吳國華



欽定四庫全書薈要

中州集

提要

  
臣等謹案中州集十卷附中州樂府一卷金

元好問輯好問有遺山集別著錄是編選金  
一代之詩首錄顯宗二首章宗一首不入卷  
數其餘分為十集以十干紀之壬集隱德一  
門列薛繼先宋可張潛曹班四人詩而獨標

繼先名疑傳寫訛脫前有好問自叙稱魏道

明作百家詩畧商衡為附益之好問又增以  
己之所錄以成是編序作於癸巳蓋哀宗天  
興二年也其例每人各為小傳詳其始末兼  
評其詩或一傳而附見數人或附載他文或  
兼及他事大致主於借詩以存史故旁見側  
出不主一格王士禎池北偶談嘗論其記蔡  
松年事不免曲筆蓋亦白璧之瑕不足以累

全體矣惟大書劉豫國號年號頗乖史法然  
豫之立國實金朝所命好問金之臣子宜有  
內詞固不得而擅削之亦未足以是為咎也  
乾隆四十二年八月恭校上

總纂官

臣紀昀臣陸錫熊臣孫士毅

總校官  
臣陸費墀



中州集原序

商右司平叔衡嘗手抄國朝百家詩畧云是魏邢州元道道明所集平叔為附益之者然獨其家有之而世未之知也歲壬辰予掾東曹馮內翰子駿延登劉鄧州光甫祖謙約予為此集時京師方受圍危急存亡之際不暇及也明年留滯聊城杜門深居頗以翰墨為事馮劉之言日往來於心亦念百餘年以來詩人為多苦心之士積日力之久故其詩往往可傳兵戈散亡計所存者

才什一耳不總萃之則將遂湮滅而無聞為可惜也乃  
記憶前輩及交游諸人之詩隨即錄之會平叔之子孟  
卿攜其先公手抄本來東平因得合予所錄者為一編  
目曰中州集嗣有所得當以甲乙次第之十月二十有  
二日河東人元好問裕之引



欽定四庫全書薈要

中州集卷首

金元好問輯

顯宗 二首

賜石右相琚生日之壽

大定辛酉  
承華殿書

黃閣今姚宋青宮舊綺園  
繡絺歸里社冠蓋畫都門  
善訓懷師席深仁寄壽尊  
所期河潤溥餘福被元元

失題

心與寥寥太古通  
手隨輕籟入天風  
山長水濶無尋處  
聲在亂雲空碧中

此詩山陽民家有上御書無篇題不知何人作  
及見唐高駢賦風箏云夜靜絃聲響碧空宮商  
信任往來風依稀似曲才堪聽又被移將別調  
中乃知上所書蓋風箏詩而又次駢韻者也姑  
存之以俟更考

章宗 一首

雲龍川泰和殿五月牡丹

洛陽穀雨紅千葉  
嶺外朱明玉一枝  
地力發生雖有異  
天公造物本無私

中州集卷首

欽定四庫全書薈要卷二萬七十四集部

中州集卷一甲集

金元好問輯

宇文大學虛中

五十首

虛中字叔通成都人宋黃門侍郎以奉使見留  
仕為翰林學士承旨皇統初上京諸虜俘謀奉  
叔通為帥奪兵仗南奔事覺繫詔獄諸貴先被  
叔通嘲笑積不平必欲殺之乃鍛鍊所藏圖書

卷一  
為反具和通歎曰死自吾分至於圖籍南來士  
大夫家例有之喻如高待制士談圖書尤多於  
我家豈亦反邪有司承風旨并寘士談極刑人  
至今寃之

鄭下趙光道與余有十五年家世之舊守官代郡  
之崞縣聞余以使事羈留平城與諸公相從皆  
一時英彥遂以應舉自免去駕短轅下澤車驅  
一僮二驢扶病以來相聚凡旬日而歸昔白樂

天與元微之偶相遇於夷陵峽口既而作詩叙  
別雖憔悴哀傷感念存沒至歎泣不能自己而  
終篇之意蓋亦自開慰况吾輩今日可無片言  
以識一時之事邪因各題數句而余為之叙夜  
將半各有酒所語不復鍛鍊要之皆肺腑中流  
出也

光道名晦時為代州士曹善篆隸詩  
筆高雅有集傳河東今不復見矣

窮愁詩滿篋孤憤氣填胃脫身枳棘下顧我雪窖中竟  
日朋盍簪論文一樽同翻然南飛燕卻背北歸鴻人生

悲與樂倚伏如張弓莫言竟憤憤作書怨天公

古劍行

為劉善長作

公家祖皇提三尺素靈中斷開王迹自從武庫衝屋飛  
化作文星照東壁夫君安得此龍泉秋水湛湛浮青天  
夔魑奔喘禺强護中夜躍出光蜿蜒拄頤櫺具男兒飾  
彈鋏長歌氣填臆嶙峋折檻霽天威將軍拜伏姦臣泣  
龍泉爾莫矜雄鉗不見鳥盡良弓藏會當鑄汝為農器  
一劍不如書數行



白菊

西風蕭颯百草黃南齋白菊占秋芳主人好事不專饗  
擷送客館分幽香幽香清豔兩難得冰雪肌膚龍麝裊  
悄然坐我藥珠宮玉斧瑤姬皆舊識仙家藝菊名日精  
我今號爾為月英月中風露秋夕好感此仙種來曾城  
憑君傳與金天令月與霜姿駐清景重陽好伴白衣來  
五柳先生憶三迳

還舍作

燕山歸來頭已白自笑客中仍作客此生悲歡不可料  
况復吾年過半百故人驚我酒尚狂為洗餅壘貯春色  
酒闌人散月盈庭靜聽清渠流瀾瀾

庭下養三鴛鴦忽去不反戲為作詩

先生久忘機為爾虞繒繳一朝長羽翮萬里翔寥廓誰  
信惡溝鵲忽作華表鶴豈無三玉鐐遺音嗣黃雀

予寫金剛經與王正道正道與朱少章復以詩來

輒次二公韻

次正道韻

平生幸識繫珠衣窮走他鄉未得歸有客為傳祇樹法  
此心便息漢陰機百千三昧一門入四十九年諸事非  
寄與香山老居士要憑二義發餘輝

又  
次少章韻

前世曾為粥飯僧此生隨處且騰騰經中因認人我相  
教外都忘大小乘寫去欲云居士頌信來如續祖師燈  
他年辱贈茅庵句誰謂因緣昔未曾

郊居

芒屨松冠野外裝  
茶鐙藥竈靜中忙  
含風荇逐波紋展  
著雨花連土氣香  
停策仰簷朝覓句  
披襟穿樹晚追涼  
蓬蒿似欲荒三迳  
疎嬾誰知意更長

歲寒堂

洞戶延清吹  
庭除貯綠陰  
不隨風月媚  
肯受雪霜侵  
潤入珠泉爽  
聲傳玉帳深  
主人留勝賞  
同此歲寒心

重陽旅中偶記二十年前二詩因而有作

舊日重陽厭旅裝  
而今身世更悲涼  
愁添白髮先春雪

淚著黃花助晚霜客館病餘紅日短家山信斷碧雲長  
故人不恨村醪薄乘興能來共一觴

春日

北渚春事休嗟晚三月尚寒花信風遙憶東吳此時節  
滿江鴨綠弄殘紅

己丑重陽在劍門梁山鋪

兩年重九皆羈旅萬水千山厭遠遊白酒黃花聊度日  
青萍綠綺共忘憂却憐風雨梁山路不似萸鱸楚澤秋

何必東臯是三逕此身天地一虛舟

生日和甫同諸公載酒袖詩為禮感佩之餘以詩

為謝

詞人詩句壓離騷按膝長吟意自豪袖裏虹蜺衝霽色  
筆端風雨駕雲濤將衰難稱千年祝增重虛蒙隻字褒  
太史已應飛急奏文星偏傍使星高

和題稽古軒

堆架縑緗粲部居眼前長物埽無餘避囂宵要鄰人卜

論友先尋上世書汲古不須憂綆短隨波聊復任舟虛  
勿欺丈室纔容膝六合神游有日車

己酉歲書懷

去國忽忽遂隔年公私無益兩茫然當時議論不能固  
今日窮愁何足憐生死已從前世定是非留與後人傳  
孤臣不為沈湘恨悵望三韓別有天

涇王許以酒餉龍溪老人幾月不至以詩促之

龍溪

叔通別  
號也

先生寂莫草玄文正要侯已作富鄰客至但須搏有酒  
日高不怕甌生塵急催嶺外傳梅使來餉籬邊采菊人  
已埽明窗供點筆為君擬賦洞庭春

從人借琴

嶧陽慣聽鳳雛鳴瀉出冷然萬籟聲已厭笙簧非雅曲  
幸從炊爨脫餘生昭文不鼓緣何意靖節無絃且寄情  
乞與南冠囚繫客為君一奏變春榮

過居庸關



奔峭從天拆懸流赴壑清路回穿石細崖裂與藤爭花  
已從南發人今又北行節旄都落盡奔走愧平生

晚宿耀武關

山與煙雲暝溪兼冰雪流寒枝啼秭鞠煬室聚唧噀此  
日征行困何時喪亂休尚矜爭席好無復舊鳴騶

安定道中

落日塵埃壯陰風天地昏牛羊爭隘道鳥雀聚空村跛  
曳傷行役光華誤主恩未甘遲莫景伏櫪意猶存

上烏林天使三首

平生隨牒浪推移只為生民不為私  
萬里翠輿猶遠播一身幽圖敢終辭  
魯人除館西河外漢使驅羊北海湄  
不是故人高誼切宵來軍府問鍾儀

又

拭玉轅門吐寸誠敢將緩頰沮天兵  
雷霆儻有矜彫弊草芥何須計死生  
定鼎未應周命改登壇合許趙人平  
知君妙有經邦策存取威懷萬世名

又

當時初結兩朝歡曾見軍前捧血槃  
本為萬年依蔭厚那知一日遽盟寒  
羊牽已作俘囚獻魚漏終期網罟寬  
幸有故人知底蘊下臣獲考敢謀安

姑蘇滕惇禮榜所居閣曰齋心成都宇文某作詩  
以廣其意

不是憑虛避世喧此中於物本無緣  
靜看畏影徒勞爾題作齋心亦且然  
意識已隨言語斷生涯聊任歲時遷

老夫未涉天游趣三復南華第四篇

和高子文秋興二首

沙碧平猶漲霜紅紛已多  
駒年驚過隙鳬影倦隨波散

步雙扶老棲身一養和  
羞看使者節甘荷牧人蓑

好問按養

和凡名事見江湖散人  
集扶老見歸去來辭

又

搖落山城莫棲遲  
客館幽葵衰前日雨菊老異鄉秋  
自  
信浮沈數仍懷顧望愁  
蜀江歸棹在浩蕩逐春鷗

又和九日

老畏年光短愁隨秋色來一持旌節出五見菊花開強  
忍元猿淚聊浮綠蟻杯不堪南向望故國又鼓臺

中秋覓酒

今夜家家月臨筵照綺樓那知孤館客獨抱故鄉愁感  
激時難遇謳吟意未休應分千斛酒來洗百年憂

四序回文十二首

春

短草鋪茸綠殘梅照雪稀暖輕還錦褥寒峭怯羅衣

又

翠連冰綻日香徑晚多花細筍抽蒲密長條舞柳斜

又

折花幽檻小傾酒綠杯深蝶舞輕風曉鶯啼老樹陰

夏

翠密圍窗竹青圓貼水荷睡多嫌晝永醒少得風和

又

草徑迷深綠蓮池浴膩紅  
早蟬鳴樹曲鮮鯉躍潭東

又

暴雨隨雲驟驚雷隱地平  
好風搖簾透輕汗挹水清

秋

晚日欣簾捲涼風覺袂搖  
遠吟高興遣長醉宿愁銷

又

短葦低殘雨虛舟帶晚潮  
斷鴻歸暗浦疎葉墮寒梢

又

慙慙蛩吟苦  
茫茫水驛孤  
日銜山色暮  
霜帶菊叢枯

冬

鵲健呼風急  
烏啼促景殘  
窟深宜兔蟄  
蒲折蔭魚寒

又

裂瓦寒霜重  
鋪窗月影清  
滅燈驚好夢  
孤枕念深情

又

秀柏留陰綠  
芳梅蘸影斜  
溜簷冰結玉  
裝樹雪飛花

燈碑五首



清陰靄靄匝城闔萬井熙熙桃李春紫陌傳呼旌旆出  
重臣新佩玉駢駢

又

鈿軸天章拜異恩驂驪花騎映朝暉手持禁鑰千門肅  
官壓東宮二品尊

又

壘原清照白登山彌隴連天麥浪寒劍戟漸銷農器出  
人家只識勸農官

又

九夏南風入舜琴  
恩風澤雨浹飛沈  
陪京最是儀形地  
先識君王解愠心

又

枹鼓無聲獄訟空  
懽謠擊壤萬家同  
時人共解班春意  
兵寢刑清第一功

館中書事

雨來蒸鬱似江鄉  
雨過西風特地涼  
尚有庭花共客恨

可無尊酒慰幽芳

時習齋

未厭平生習氣濃  
更將餘事訓兒童  
魯論二萬三千字  
悟入從初一句中

醉經齋

傍人但笑腹便便  
枕籍詩書正晝眠  
不識先生真悟處  
未離文字已逃禪

醉墨齋

旋汲清泉起穀紋定知婁永是前身箇中自可逃真性  
不用淋漓汗葛巾

烏夜啼

汝琴莫作歸鳳鳴汝曲莫裁白鶴怨明珠破壁挂高城  
上有烏啼人不見堂中蠟炬紅生花門前紺幃七香車  
博山夜長香燼冷悠悠蕩子留倡家妾機尚餘數梭錦  
織恨傳情還未忍城烏為我盡情啼知道單棲淚盈枕

吳學士激

二十五首

激字彥高宋宰臣拭之子王履道外孫而米芾  
元章壻也工詩能文字畫得其婦翁筆意將命  
帥府以知名留之仕為翰林待制出知深州到  
官三日而卒有東山集十卷并樂府行于世東  
山其自號也出散關詩云春風蜀棧青山盡曉  
日秦川綠樹平愈甫索水墨以詩寄之云煙拂  
雲稍留淡白雲蒸山腹出深青三衢夜泊云山  
侵平野高低樹水接晴空上下星太清宮云玉

座煙霞春寂寂石壇星斗夜蒼蒼呈正甫云手  
版西山聊復爾角巾東第定何時遊南溪潭云  
竹院鳴鐘疑物外畫橋流水似江南飛瀑巖云  
數樹殘花喜春在一聲啼鳥覺山深詠鄭郎故  
伎云玉雪自知塵不浣丹青難寫酒微醺送樂  
之侍郎云四海蒼生謝安石一言宣室賈長沙  
送韓鳳閣使高麗云海東絕域皇華使天上仙  
官碧落卿偶題云江湖歌枕夢風雪打窗時此

類甚多樂府夜寒茅店不成眠南朝千古傷心  
事誰挽銀河等篇自當為國朝第一手而世俗  
獨取春從天上來謂不用他韻風流子取對屬  
之工豈真識之論哉

山中見桃花李花

錦里春風徧海棠別時無計奈紅芳  
山中桃李渾疑晚  
猶有殘花斷客腸

長安懷古

佳氣猶能想鬱葱  
雲間雙闕峙蒼龍  
春風十里灞陵樹  
曉月一聲長樂鐘  
小苑花開紅漠漠  
曲江波漲碧溶溶  
眼前疊嶂青如畫  
借問南山共幾峰

宿湖城簿廳

日遲風暖燕飛飛  
古柳高槐面翠微  
卷上疎簾無一事  
滿池春水照薔薇

窮巷

窮巷無來轍  
貧家有舊醅  
窓明憐雪在  
睡美覺春回  
菜



甲方齊拆梅花亦半開茅簷鳴好鳥節物莫相催

偶成二首

一番瘦筍羽林槍松架陰陰盡日涼繞屋雲煙無定態  
連山草木有真香

又

蟹湯兔盞鬪旗槍風雨山中枕簟涼學道窮年何所得  
只工埽地與焚香

病後寄開甫

暗蛩咽幽響隙月漏微光溪上風雨過翛然有餘涼病  
瘦鶴骨立低垂不能翔懷我中山兄開經焚道香猿嘯  
耿清夜鐘鳴悠夕陽商秋早晚至夢寐松楸蒼

過南湖偶成

杏山松檜紫坡陀湖面無風亦自波綠鬢朱顏嗟老矣  
落花啼鳥奈春何詩人未必皆憔悴世事從來有折磨  
列坐流觴能幾日知誰對酒愛新鶯

夜汎渦河龍潭

輕舟弄素月靜夜橫清渦天風毛髮亂疎星燦明河圖  
經記父老冥冥年歲多淵沈三千丈湛碧寒無波微流  
帶文藻絕岼無柔莎炯如帝鴻鏡可鑒不可磨中蟠至  
神物役使羣蛟鼉蜿蜿頭角古勁鬣誰敢劇深宮照珠  
貝頗費蚌與螺何時葛陂竹化作陶公梭

秋興

後園雜樹入雲高萬里長風夜怒號憶向錢塘江上寺  
松窗竹閣瞰秋濤

晚春言懷寄燕中知舊

閒雲洩洩日暉暉  
林斧谿春響翠微  
天氣乍晴花滿樹  
人家久住燕雙飛  
鄰村社後容借酒  
客舍新來未綻衣  
遙憶東郊亭畔柳  
歸時相見亦依依

歲暮江南四憶

瘦梅如玉人一笑  
江南春照水影如  
許怕寒粧未勻  
花中有仙骨物外  
見天真驛使無消  
息憶君清淚頻

又

天南家萬里江上橋千頭夢遶闔門迴霜飛震澤秋秋  
深宜映屋香遠解隨舟懷袖何時獻庭闈底處愁

又

吳淞潮水平月上小舟橫旋斫四腮鱠未輸千里羹擣  
蘆香不厭照箸雪無聲幾見秋風起空悲白髮生

又

平生把螯手遮日負垂竿浩渺渚田熟青瑩漁火寒憶  
看霜菊艷不放酒杯乾比老垂涎處糟膾箇箇團

述懷

旅食空彈鋏歸休合挂冠  
煙塵掄塞遠風雨麥秋寒  
巢燕長如客鳴蛙不屬官  
柴門江漲到落日下漁竿

喜晴和張魯瞻

原野悅新沐豐隆寧世情  
烏歸林靄暝樓射澗虹明  
春草牛羊遠人家機杼鳴  
慘舒長有命誰復問陰晴

國公女生日席上命賦

雪射瑤堦月春回玉女扉  
雲中三秀草石上六銖衣  
酒

熟鷺兒色身輕燕子飛客槎還汎斗誰解卜揲機

秋夜

豈有涓埃補盛明強扶衰病厠豪英夜窗燈火青相對  
曉鏡鬚鬚白幾莖年去年來還似夢江南江北若為情  
石田茅舍君家近借與林泉送此生

招趙資深拾遺

別久貌逾壯道同心更親移居近韋杜相對邈參辰雪  
少似饒客鳥喧知得春歸期淹幾日莫厭馬蹄頻

同兒曹賦蘆花

天接蒼蒼渚江涵裊裊花秋聲風似雨夜色月如沙澤  
國幾千里漁村三兩家翻思杏園路鞭裊帽簷斜

張戡北騎

張生鞍馬客幽都却笑靈光筆法麤祇今白首風沙裏  
憶向江南見畫圖

早春

寂寂重寂寂出門春草齊晚芳猶著樹江漲欲平溪山



暝有時雨村深何處雞遠山緣底恨故作傷人低

雞林書事

箕子朝鮮僻蓬丘弱水寬儒風通百粵舊史記三韓邑  
聚居巢慣夷裝被髮安猶存古籩豆兼用漢衣冠兔穎  
家工縛鮭腥俗嗜餐騎兵腰玉具府衛挾金丸長袖鳶  
窺肉都場狎掛竿琴中蔡氏弄指下祝家彈主禮分庭  
抗賓筵百拜難漬橙釐釀旨滋桂鹿脩乾潑墨松如櫛  
墮牆石似丹地偏先日出天迫衆山攢鵬翼雲帆遠羊

腸石磴盤由來異文軌休訝變暄寒事可資談柄誰能  
記筆端聊將詩貌取歸作畫圖看

題宗之家初序瀟湘圖

江南春水碧於酒客子往來船是家忽見畫圖疑是夢  
而今鞍馬老風沙

張祕書斛一十八首

斛字德容漁陽人仕宋為武陵守國初理索北  
歸官祕書省著作郎有南游北歸等詩行于世

漁陽有峒陽故詩中多及之如賦小孤山云天  
圍秋漲濶山背夕陽孤岸樹晴猶溼汀煙近却  
無巫山對月云雲開千里月風動一天星河池  
出郭云細草沙邊樹疎烟嶺外村中江縣樓云  
綠漲他山雨青浮近市煙中秋云月色四時好  
人心此夜偏松門峽云春木有秀色野雲無俗  
姿賦禮部侍郎張浩然遼海亭云晴光搖碧海  
遠色帶滄洲又賦臨漪亭云雨聲喧莫島水色

借秋空秋興樓云碣石晚風催鴈急  
昭初寒漲與雲平人多誦之予嘗見其  
文筆字畫皆有前輩風調宇文大學甚  
激賞之

沙邊

晚雨漲平堤沙邊獨杖藜長風催鴈  
北衆水避潮西楚客相逢少吳天入  
望低故園無路到春草自萋萋

東川春日

巴蜀三年客江湖萬里情滄波何處  
盡歸棹幾時行世

態浮雲變春愁細草生羣山遮望眼片月上高城

巫山對月懷湖外親友

衆壑歛新雨孤舟增暮寒巫山今夜月湘水幾人看不  
得臨湖醉惟愁下峽難雙魚憑寄遠尺素勸加餐

武陵春雪

天風吹雪滿千山不見桃花汎碧瀾洞裏仙人貪種玉  
豈知人世有春寒

盧臺峭帆亭

高秋客未還何處望鄉關喬木蒼烟外孤亭落照間雨  
晴山覺近潮滿水如閒目斷峒陽路歸雲不可攀

高寺

高寺鳴鐘後孤舟落鴈邊已知歸徑晚故就上方眠石  
峻溜聲急月高松影圓明朝下煙靄回首阻清川

寓中江縣樓

武江斜轉石文岫獨參天

江曰玄武山曰文遠

綠漲他山雨青浮

近市煙松薪炊白粲水蔓繫紅鮮自喜飄蓬跡安居過

兩年

迴文二首

野曠悲行客  
湍驚礙去船  
夜江清汎月  
秋草碧連天

又

綠逕斜繁草  
紅梢半落花  
曲池風碎月  
歌岸雨摧沙

仙門驛聽泉

一亭圍古木  
雙磎瀉清流  
行到雲山莫  
卧聞風雨秋  
客塵何日浣  
病渴此時瘳  
歸去南溪上  
輕舟細浪浮

夜雨南山

雨夜宿山齋夜深雨聲息石室含餘清風枝墮殘滴

平安關道中二首

高林俯青冥柯葉森若織陽光已轉午陰嶺仍半黑崢  
嶸亂石間行子有苦色臨深地勢入涉險天宇塞四顧  
無所投迹蠱去未息悵然增百憂冥冥羨歸翼

又

窮冬十日陰積雪千山路晴雲開半嶺落日猶在樹悠



悠客心速慘慘天色莫寒鳥各有依解鞍尚無處游魚  
誤銜鉤元豹終隱霧行行謝冠冕復我林壑趣

將渡江

無數飛花委路塵不堪重醉楚城春明朝回首江南岸  
煙雨昏昏不見人

還家

雲林無俗姿相對可終老如何塵中人不見青山好

訪香林老

風雨無時浪蹴天南浮舟楫信多艱半生夢破寒江月  
萬里春回故國山歸客自傷青鬢改高僧長共白雲閒  
誅茅借我溪西地未厭相從水石間

海邊亭為浩然賦

夙有滄洲趣雲扃夢幾回臨深疑地盡望遠覺天開月  
湧冰輪出濤翻雪陣來無機同海客鷗鳥莫相猜

南京遇馬丈朝美

浮雲久與故山違茅棟如存尚可依行路相逢初似夢

舊游重到復疑非滄江萬里悲南渡白髮幾人能北歸  
二十年前河上月尊前還共惜清輝

蔡丞相松年

五十九首

松年字伯堅父靖宋季守燕山仕國朝為翰林  
學士伯堅行臺尚書省令史出身官至尚書右  
丞相鎮陽別業有蕭閒堂自號蕭閒老人薨謚  
文簡百年以來樂府推伯堅與吳彥高號吳蔡  
體有集行於世其一自序云王夷甫神情高秀

宅心物外為天下稱首言少無宦情使其雅詠

玄虛不經世務超然遂終其身則亦何必減嵇阮

輩而當衰世頽俗力不可為之時不能遠引高

蹈顛危之禍卒與晉俱為千古名士之恨又嘗

讀山陰詩引考其論古今感慨事物之變既言

脩短隨化期于共盡而世殊事異興懷一致則

死生終始物理之常正當乘化歸盡何足深歎乃

區區列叙一時述作刊紀歲月豈逸少之清真

簡裁亦未盡忘情於此耶故因作歌併及之好  
問按此歌以離騷痛飲為首句公樂府中最得  
意者讀之則其平生自處為可見矣二子珪字  
正甫璋字特甫俱第進士號稱文章家正甫遂  
為國朝文宗特甫非其比也自大學至正甫皆  
有書名其筆法如出一手前輩之貴家學蓋如  
此

晚夏驛騎再之涼陞觀獵山間往來十有五日因

書成詩

兜羅蔥鬱浮空青曉日馬頭雙眼明  
名山不作世俗態千里傾蓋來相迎  
老松閱世幾千尺玉骨冷風戰天碧  
應笑年年空往來塵土勞生總陳迹  
山回晚宿一川花翦金裁碧  
明烟沙寒鄉絕艷自開落欲慰寂寞無流霞  
明日行營獵山麓古樹寒泉更深綠  
強臨水玉照鬢毛只恐山靈恠吾俗  
陂潮不盡水如天清波白鷗自在眠  
平時朝市手遮日思把一竿呼釣船  
驛騎回時山更好

過雨秋容淨如埽山英知我宦游心為出清光慰枯槁  
可憐歲月易侵尋慙愧山川知我心一行作吏豈得已  
歸意久在西山岑他年俗累麓能畢雲水一區供老佚  
舉杯西北酹山川為道此言吾不食

漫成

人生各有適一受不可更違已欲徇世憂患常相嬰三  
軍護漢將九鼎調蒼生功名豈不美強之輒無成朝昏  
忘寢食俯仰勞心形何如從所好足以安餘齡予也一

丘壑野性真難名力懦謝提劍才拙慙窮經疎放已成  
僻紛華誰與爭驚鹿便草豐白鷗願江清不堪行作吏  
萬累方營營夜慮多俗夢曉枕無餘醒拄頰西山語適  
意千里羹塵土走歲月秋光浮宦情欲語箇中趣知音  
耿晨星世途古今險方寸風濤驚封侯有骨相使鬼須  
銅腥誓收此身去田園事春畊

淮南道中五首

南楚二月雨淮天如漏卮畏途泥三尺車馬真難棲却



思閒居樂雨具無所施高枕聽簷聲爐烟暈如絲

又

吾年過五十所過知前非顏鬢日蒼蒼老境行相追枯  
槔聽俯仰隨人欲何為歸計勿悠悠出處吾自知

又

南渡國不競晉民益瘡痍陶翁遂超然不忍毀其醺北  
窗談清風慨望羲皇時道喪可奈何抱琴酒一卮

又

金方四月  
三年鎮陽遊春歸綠扶疎櫻筍媚園林日長閒枕書行  
復當此時涼塵暗歸塗會洗醑醑雪月波浮祕壺

又

鎮陽亘西南山河在圖畫花雨草煙間人家或僧舍經  
行每悵然真賞知未暇待予籃輿歸香火復蓮社

丁巳九月夢與范季雷同登北潭之臨芳亭覺而  
作詩記其事以示范

高陵五六松潭水涵清陰白鳥如避世巢居得幽深雜

花眩青紅苦節方森森何人作虛亭想像雲棲心我夢  
涉陳迹君亦同登臨相與定嘉名洗去花草淫看雲撫  
脩碧夕景低遙岑風林淡秋月霜枝鳴玉琴兩意誰識  
之好處煩幽尋閒居志則同歲月能駸駸時無陶彭澤  
此曲難知音亭前有奇石遷流失山林顧亦如我曾鬢  
髮風沙侵小兒重外物列屋享千金區區心甚長因循  
困華簪忽焉事大謬危機恐難任平生下澤車斯言吾  
所欽志士願不辱俗情便孔壬自喜迹猶淺鳬鴈容浮

沉泥行自蕭散世路皆崎嶇此邦真可老城郭環清潯  
結廬與君俱開寫平生襟里巷日還往杖屨行謳吟還  
尋夢遊處無忘神所箴

庚申閏月從師還自潁上對新月獨酌十三首

伊昔三年前淫雨催行輶青燈忽今夕華屋暎高秋華  
屋亦何為百年竟山丘適意在歸與肉食非我謀

又

大塊本何事遑遑勞一生所過總陳迹歲月如流星貪

夫甘死禍幅紙馳虛名晉室有先覺柴桑老淵明

又

我家恒山陽山光碧無賴月窟陰風篁十里瀉澎湃  
茲焉有樂地不去欲誰待自要塵網中低眉受機械

又

人言歸甚易但苦食不足必使極其求萬鍾不盈腹處  
世附所安無禍即無福却視高蓋車身寵神已辱

又

我本山澤人孤烟一輕蓑功名無骨相彫琢傷天和未  
能遽免俗尚爾同其波梧桐喚歸夢無奈秋聲何

又

孟夏幽州道上陞車輾轉旌旗却南行飛電隨馬足行  
窮清潁水不辨洗蒸溽吾生豈匏瓜一笑為捧腹

又

燈花何太喜似報天雨霽客情念還家如瞽不忘視到  
家問松菊早作解官計青鏡髮蕭蕭及此霜雪未

又

鳴蛙屬官私庸兒固可笑江山本誰爭但苦歸不早物  
情閒始見宛轉為君好區區乞鑑湖多事憐賀老

又

天下任之重人物古難得誰為經濟才有亦未易識吾  
曹與雞鶩官倉等伏食行將問征途滿眼西山碧

又

懦微莫如我往往從險艱譬之驅山廩八鑾困天閑豈



惟物違性成功亦良難風煙念何地野水長松閒

又

出處士大節倚伏殊茫茫絕交苟不作自足存嵇康哲  
人乃知機曲士迷其方顧我類社櫟匠石端相忘

又

問舍前年秋已買潭西地高明鬼所瞰聊取風雨蔽瀕  
溪樹嘉木成陰十年計仍當作茅舍名之以今是

又



斯言已饒饒要未離憂患何時但飲酒臧否了不關不  
飲逝者多秋草麒麟閒懷哉竹林人吾方仰高山

七月還祁

洪河注天南兵氣橫高穹我從兵前來歸心疾驚鴻官  
柳未搖落蓮苒香濛濛吏舍在前村舊年養疎慵爰自  
三軍去青苔瘞人蹤夕陽叩柴門歡迎來僕僮濁酒古  
壘洗停觴問新松却對一床書睡鴨孤烟中土花暈湖  
玉冰絃冷霜桐燈火未可親露坐茅堂東西山月中淡

夜茶煮松風到床便安寢不復知晨鐘平生幽棲心斯  
言畧形容人道動有患百態交相攻而我觸類真治容  
鄙青紅非才見臨事叩之輒空空知難不知回飄流劇  
飛蓬暫去聲利場樂佚猶無窮況於得行意蕭洒畢此  
躬勿為才者傳從渠作夔龍

庚戌九日還自上都飲酒於西崑以野水竹間清  
秋巖酒中綠為韻十首

雞羣媚稻梁老鶴日疎野人言隨其流故有不同者

又

骨相乃封侯銅腥能使鬼文章亦可憐不直一杯水

又

在昔安九鼎功名照帛竹貞觀用玄成一士天下足

又

憂國在肉食歛玉裁清班吾曹漫浪人合眼松雲間

又

閒居度重九昔賢愛嘉名霜菊有正色糟床逢聖清

又

平生一丘壑晚墮法家流一點無俗物今年真好秋

又

謝公既經世永懷東西巖翠袖亂清光輕雲點風鬟

又

我得秋風暇鱸魚一杯酒佳人發浩歌此樂真不朽

又

去年哦新詩小山黃菊中年年說秋思遠目驚高鴻

又

韙哉生處樂陵谷異風俗南枝吾永安笑撫西嵒綠

小飲邢嵒夫家因次其韻

東風初度野梅黃醉我東山雲霧窗只今相逢暮春月  
夜床風雨翻寒江人生離合幾春事霜雪行侵青鬢雙  
大梁一官且歸去酒腸雲夢吞千缸

閒居湯興

歸田不早計歲月易云徂但要追蓮社何須賜鏡湖簿

書欺俗吏繩墨守愚儒安得如嵇阮相從興不孤

師還求歸鎮陽

春風卷甲有歡聲漸識天公欲諱兵節物無情新歲換  
男兒易老壯心驚落身世網癡仍絕挂眼山光計未成  
聞道恒陽似江國一官湯學阮東平

初卜潭西新居

喬木千章畫不如白鷗煙雨到江湖誰為求仲營三徑  
竊比揚雄有一區故國興亡樹如此他年聲利蔓難圖

屋西便與秋山約莫遣歸來見白須

寄王仲侯

冰簟風簾千柱宮月華清浸雪芙蓉誰教曉馬三千里  
好在行雲第幾峯酒市烏紗懷李白仙人鶴氅看王恭  
拍浮花裏知恩否寄與新詩洗醉悰

有本事可發一笑

讀疎詠之安陽對竹二詩懷家山次韻見意

短髮新霜及未侵幾年和月買泉林偶然行李對寒碧  
憶得故園驚歲陰枕上秋嵐吹醉夢門前沙鳥立清深

箇中須著脩脩玉落日微風伴我吟

和子文寒食北潭

夢裏潭光翠欲流何時春水一虛舟  
吾廬想見扶疎樹宦意渾如浩蕩鷗  
聞道西山明酒面應無外物到眉頭  
別來誰唱驚人句十里珠簾有暮愁

雪晴呈玉堂諸公

雪晴松頂玉爛斑曉眼清於化鶴山欲立凍雲搜傑句  
却思仙客退清班攴旒帳底沉香火薝蔔花中碧霧鬟



喚取廣寒脩月手月波千丈捲春還

和子文晚望

醉眼郊原感慨生夕陽長向古今明  
高人法士互憎愛美酒空名誰重輕  
二頃只謀他日老五絃猶喜晚風清  
因君欲賦思歸樂安得穿雲一笛橫

兵府得告將還鎮陽府推官王仲侯以書促予命  
駕先寄此詩

老驥心疲十二閑天教洗眼小江山  
名園無處不宜酒

勝日有朋方解顏老木溪光留月駐禪房竹徑約花關  
先憑樂府求風骨或有佳人字玉環

渡混同江

十年八喚清江渡江水江花笑我勞老境歸心質孤月  
倦游陳迹付驚濤兩都絡繹波神肅六合清明斗極高  
湖海小臣尸厚祿夢尋烟雨一漁舸

初至遵化

出山風物便清和森木如雲秀靄多白水臨流照疎鬢

青門折柳記柔柯重游化國驚歲月有象豐年占麥禾  
亦有黃公酒壚在微官自要阻山河

黃海棠

清陰不歎晚尋芳縹緲雲翠袖長萼綠江花輸帶葉  
醉紅蜀艷恨無香南州氣味連三月東晉風流共一觴  
老眼寒來易愁絕溫柔乞與醉中鄉

夜坐

吾生有幾事無涯清夜湯湯歎物華但願聞鉦似疲馬

可能粘壁作枯蝸只今雪屋重衾溼去歲梅溪醉帽斜  
終得蕭閒對床語青燈挑盡短檠花

槽聲同彥高賦

糟床過竹春泉句

聚簷秋雨喧疎溜過竹春泉咽暗水門巷蕭條三尺雪琴書寥落一龕燈

彥高詩也他日人云吾亦云自愛淳音含太古誰傳清溜入

南薰秋風幾共橙香注曉月曾和鶴唳聞我欲婆娑竹  
林國洗空塵耳正須君

韓侯晁仲許送名酒渴心生塵以詩促之

好在銀鉶秋露光  
借君雲夢到枯腸  
解澆萬里客愁破  
暫吐十年黃卷香  
江水苦搖梁  
苑夢海棠新  
學漢宮粧  
天東四月春如許  
坐待白衣投醉鄉

步尋野卉

風煙草木照人明  
神藥奇花問識名  
聞道東州有仙窟  
欲尋根撥學長生

癸丑歲秋郊

漫漫黃雲水清淺  
碧花無處亂鳴蜚  
此生愈覺田園樂

夢裏曉山三四峯

入關宿昌平

黃塵却送入關山  
自斷何如二頃田  
記得鳴蜚碧花句  
蹉跎秋思又三年

秋日

風螢開闔度松陰  
松下飄然倦客心  
幾點清光照涼夜  
何時遠寺得幽尋

高麗館中二首

蛤蜊風味解朝醒  
松頂雲凝雨不晴  
悄悄重簷斷人語  
碧壺春筍更同傾

又

晚風高樹一襟清  
人與縹緲相照明  
謝女微吟有深致  
海山星月總關情

西京道中

來時綠水稻如鉞  
歸日青梢沒鶴深  
莫忘共山買田約  
藕花相間柳陰陰

金方日人卷一  
銀州道中

小渡霜螯賤於土重崑野菊大如錢此時最憶涪翁語  
無酒令人意缺然

高昌館道中

雨餘崑石古苔青松裏珠璣萬葉明渺渺綠畦看鷺立  
深深清樾有蟬鳴

黃海棠

輕如紅豆排冰雪一拂新鶯色更奇不覺濃陰破明玉



有情誰解賞離披

梅花

的皪橫枝愛老崔一尊長對畫圖開此生端有梅花分  
閒遠春風入手來

蔡太常珪

四十六首

珪字正甫大丞相松年之子七歲賦菊詩語意  
驚人日授數千言天德三年進士擢第後不赴  
選調求未見書讀之其辨博為天下第一歷澄

州軍事判官三河簿正隆三年銅禁行官得三代以來鼎鐘彝器無慮千數禮部官以正甫博物且識古文奇字辟為編類官丁父憂起復翰林脩撰同知制誥改戶部員外郎大常丞朝廷稽古禮文之事取其議論為多大定十四年由禮部郎中出守濰州道卒有續歐陽文忠公集錄金石遺文六十卷古器類編三十卷補南北史志書六十卷水經補亡四十篇晉陽志十二

卷金石遺文跋尾一十卷燕王墓辨一卷傳于世國初文士如宇文大學蔡丞相吳深州之等不可不謂之豪傑之士然皆宋儒難以國朝文派論之故斷自正甫為正傳之宗党竹谿次之禮部閒閒公又次之自蕭戶部真卿倡此論天下迄今無異議云

野鷹來

南山有奇鷹寘穴千仞山網羅雖欲施藤石不可攀鷹

朝飛聳肩下視平蕪低健狐躍兔藏何遲鷹莫來腹肉  
一飽精神開招呼不上劉表臺錦衣少年莫留意飢飽  
不能隨爾輩

撞冰行

船頭傳鐵橫長錐十五五張黃旗百夫袖手畧無用  
舟過理棹徐徐歸吳儂笑向吾曹說昔歲江行苦風雪  
揚槳啟路夜撞冰手皮半逐冰皮裂今年窮臘波溶溶  
安流東下閒篙工江東賈客借餘潤貞元使者如春風

讀史

夏氏不無釁作孽生妖龍蒼姬丁衰期元龜游後宮天  
心未悔禍墜此文武功厭弧漏天網哲婦鴟梟同狂童  
一何愚巧言惟爾從殷鑒不云遠覆車還蹈蹤坐令周  
南詩悲入黍離風君看後庭曲曾笑驪山烽

醫巫閭

幽州北鎮高且雄倚天萬仞蟠天東祖龍力驅不肯去  
至今鞭血餘殷紅崩崖暗谷森雲樹蕭寺門橫入山路

誰道營丘筆有神只得峯巒兩三處我方萬里來天涯  
坡陀繚繞昏風沙直教眼界增明秀好在嵐光日夕佳  
封龍山邊生處樂此山之間亦不惡他年南北兩生涯  
不妨世有揚州鶴

讀戎昱詩有作二首

我家北潭邊溪流卧衡門俗客自不來好客時開尊路  
人或不知云是渭南村底事半年別此懷誰與論

又

來時西郊林木末秋未老借箸數歸日迺復見冬杪心  
馳倚門望望我綿綿道慙愧戎子詩在家貧亦好

感寓

九官名世人制作歸一變達樂不達禮漢儒言足嗤古  
人寓意耳結髦持鍛鎚俗子未易識絕藝聊相推坐令  
編簡門亦以專門奇堂堂張長史指妙世莫知謂予言

不信願視郎官碑

奇疑  
作期

風竹如水聲

好竹風淅淅流水聲泠泠吾廬兼有此要是佳友生北  
窗午夢斷冷簟無飛蠅端疑故人至喚作寒泉鳴攬衣  
起裊徊自笑還自驚無須問形似自可名雙清

荷香如沉水

新荷翠參差十畝藏漪瀾臨風倚雲蓋過雨驚珠盤夕  
陽香四來坐我西闌干三徑未論菊九畹空羞蘭聊分  
海南珍炷之古博山誰能品優劣待以季孟間

鄰屋如江村



斜川一壺玉川東三四家  
離落半流水茁茁青蒲芽  
我為水邊游月魄舒晴華  
隔離見燈火兒語時紛拏  
想像澤南州寄興棲雲霞  
從渠非知音我意亦自嘉

保德軍中秋

定羌城下河南流定羌城上三層樓  
使君置酒勞行役今夕何夕當中秋  
孤烟落日明天末洶涌碧雲俄莫合  
惺惺騎馬雨中歸造物戲人無乃虐  
統如戍鼓方三更夢回一室還虛明  
出門驚笑遽如許浮雲四卷秋天清

金 詞 四 庫 全 書  
卷 一  
誰家高會蹙珠箔笑語聲從雲外落倦客明朝又短亭  
行人何似居人樂

雪和坡公韻

門外黃昏噪晚鴉瑤塵細逐九雲車豐年待作三登兆  
莫景重開六出花濁酒無人同此興扁舟有客訪誰家  
明朝試望東林樹百尺寒梢倚玉叉

登陶唐山寺

嶺外高槐驛路長嶺頭蕭寺俯朝陽定知絕頂有佳處

聊與瘦藤尋上方千里好風隨野色一軒空翠聚山光  
道人底是怜行役不惜禪床坐午涼

到廣黃河

清漳節物似清江不復尊鱸夢故鄉歷下果能留太白  
鏡湖端是屬知章身隨客路常岑寂心與沙鷗共渺茫  
尚困馬蹄三百里小舟聊與過滄浪

簡王溫父昆仲

荷鈿小小半溪香槐幄陰陰一畝涼飛絮亂將春色晚

行雲間屬莫山長求田已喜成三徑適意真堪寄一觴  
君是山陰換鷺手可無傑句傲風光

秋日和張溫仲韻二首

琴裏忘憂盡日彈百憂俱息夜初闌青燈把卷逢真味  
綠酒傾尊破薄寒月色半留梧影上露華應到菊花團  
在家須信貧猶好夢想人間行路難

又

照水疎林萬木蒼迎軒爽氣一襟涼有時獨聽溪舂坐

無事方驚晝景長  
雲薄西山聊隱見  
烟橫白鳥去微茫  
可憐騎省多秋思  
拘士安能識大方

和彥及牡丹時方北趨薊門情見乎辭

舊年京國賞春濃  
千朶曾開共一叢  
好事祇今歸北圃  
知音誰與醉東風  
臨觴笑我官程遠  
賦物輸君句法工  
却笑燕城花更晚  
直應趁得馬家紅

戲楊新城

長短亭中竟日忙  
解鞍初喜水雲鄉  
風前列席花鈿秀

金定四庫全書  
卷一  
雨後行厨杏粥香  
春色紛紛驚過眼  
歌聲故故促傳觴  
蓬萊殿下同年客  
定笑狂夫老更狂

和曹景蕭暮春即事

戶部尚書望之

瓮頭春色開重耐  
門外春風改袂衣  
灼灼向來花又笑  
翩翩幾處燕于飛  
山陰未辨羲之集  
沂上聊從點也歸  
節物驚心遽如許  
却因觀化識天機

并門無竹舊矣  
李文饒嘗一植之  
至今寺僧日為  
平安報其難可知  
已官舍東堂之北  
種碧蘆以

寄意因作長句

青君那肯顧寒鄉試著葭蘆擬汶篁有若何堪比夫子  
虎賁猶想見中郎色添新雨簾櫳好聲入微風枕簟涼  
他日東堂慙政拙只將此物當甘棠

春陰

城上春陰暗晚空城頭山色有無中似聞啼鳥來幽樹  
已有游絲曳好風流水小橋歸未得落霞孤鶩興無窮  
林花不解東君意邀勒遊人未破紅

初至洛中

水北醑醑半欲芳  
長條十丈更餘長  
春風得得憐羈客  
借與窗櫺六日香

雷州道中

扇底無殘暑  
西風日夕佳  
雲山藏客路  
煙樹記人家  
小渡一聲擄  
斷霞千點鴉  
詩成鞍馬上  
不覺在天涯

飲陳氏第代主人留客

風定息林葉  
雨晴開夕陽  
停歌方待月  
挿羽且傳觴  
文



舉客常滿次公醒亦狂更闌君莫去促席就新涼

寄通州王倅

長夏少人事官閒簾戶深枕涼秋入夢林密翠交陰適  
欲非吾事謀閒遂此心絕交吾豈敢覓句識知音

出居庸

亂石妨車轂深沙困馬蹄天分斗南北人問日東西側  
脚柴荆短平頭土舍低山花兩三樹笑殺武陵溪

葵花

北墉開處葉森森  
政以多花負賞音  
小智區區能衛足  
孤忠耿耿祇傾心

讀史

伯陽名迹世人知  
太史成書未免譏  
不是道家齊物我  
豈容同傳著韓非

閭山

西風絕境撫孤松  
千里川原四望通  
但恠林梢看鳥背  
不知身到碧雲中

十三山下村落

閭山盡處十三山溪曲人家畫幅間何日秋風半篙水  
小舟容我一蓑閒

暮春

陌上歌聲枕上聽秋千梧影兩亭亭春風三月正花好  
曉日一竿初酒醒

即事

竟日開編樂有餘古人妙處不欺予胸中更著五千卷

未到漢家城旦書

燕山道中三首

款段乘涼未五更徐河十里霧中行前邨烟樹望不見  
欲到忽聞雞犬聲

又

獨輪車重汗如漿蒲秸芒鞋亦販商我自行人更怜汝  
却應達者笑予狂

又

燕南趙北困風埃投宿雲居眼暫開明日都門選官路  
逢人羞道見山來

太白捉月圖

寒江覓得釣魚船月影江心月在天世上不能容此老  
畫圖常看水中仙

雪谷早行圖

冰風刮面雪埋屋客子晨征有底忙我欲題詩還自笑  
東華待漏滿靴霜

華亭圖

頭無片瓦足無土不犯清波過一生釣得金鱗便歸去  
依然明月大江橫

畫眉曲七首

樓外春山幾點螺樓頭望處染雙蛾不知深淺隨宜否  
却倩菱花問眼波

又

小閣新裁寄遠書書成欲遣更踟躕黛痕試與雙雙印

封入雲箋認得無

又

纖葉斜橫蜀柳條  
拂成風思自妖嬈  
元和才子才猶拙  
只對春風詠舞腰

又

畫手新翻十樣圖  
西巡故事出成都  
憑君列置華堂上  
與問丹青解語無

又

龍尾雲根玉作紋  
紋間有月半痕新  
若為喚取文姬輩  
分付雲窗筆下春

又

未識春愁識曉醒  
嬌啼恰恰似雛鶯  
日高阿母嗔粧晚  
促畫鴉兒轉不成

又

時世華粧巧鬪春  
張卿態度獨清新  
五陵年少多才思  
數點章臺走馬人



高內翰士談 三十首

士談字子文一字季默宋韓武昭王瓊之後宣  
和末任忻州戶曹仕國朝為翰林直學士皇統  
初預宇文大學之禍有蒙城集行于世如云寒  
花貪晚日瘦竹強秋霜又題禹廟云可憐風雨  
胼胝苦後世山河屬外人時人悲之子公振字  
特夫亦有詩名

梨花

中原節物正梨花配寒食黃昏一雨過滿地嗟狼籍塞垣春已深花事猶寂寂朝來三月半初見一枝白爛熳雪有香瓏鬆玉仍刻芳心點深紫嫩葉裁輕碧懶慢不出門雙餅貯春色殷勤遮老眼邂逅慰愁夕一尊對花飲况有風流客酒闌思故鄉相顧空歎息

將赴平陽諸公祖席分韵作

灞橋波似箭南浦草如裙此夜燈前淚他年日暮雲醉和醒一半悲與笑相分莫作陽關疊愁多不忍聞

予所居之南下臨短壑因鑿壁開窗規為書室坐  
獲山林之趣搦曰野齋且作詩約諸友同賦

我本麋鹿姿強服冠與簪束縛二十年夢寐遊山林竭  
來古晉國官舍南城陰鑿壁取疎豁開窗舒滯淫山光  
射几席野色供登臨怡顏盼庭柯明目增遙岑草木通  
榮落雲烟自浮沈玩彼物色變感此歲月侵兀坐獨無  
人窺簷轉幽禽誰知城市中閒若郊居深巷陋顏子樂  
地偏陶令心一室亦何有狼籍書與琴晴暉朝徙倚皎

月夜相尋欲賦畔牢愁先為梁父吟詩成輒自和酒熟  
時孤斟結茅會有期種竹當及今日來官更忙塵埃滿  
衣襟暮歸唯憊卧筋力殊不任常思返丘壑豈願紆朱  
金遙知北山處猿鶴餘清音

春愁曲

壓花曉露萬珠冷金井呶啞轉纖綆寶堦寂寂苔紋深  
東風搖碎湘簾影芙蓉帳暖春眠重窗外啼鶯喚新夢  
推枕起來嬌翠顰一線沈烟困金鳳游絲飛絮俱悠颺

慵倚繡床春晝長  
郎馬不嘶芳草暗  
半篩急雨飛橫塘  
次韻東坡定州立春日詩

柳色看猶未  
梅花折已堪  
流年空客恨  
舊事與誰談  
落日窺愁絕  
東風半醉酣  
雲深歸曉鴈  
水暖浴春蠶  
從事終無愧  
空餐色有慙  
家山方杳杳  
官府謾覃覃  
隱几心猶靜  
焚香鼻觀參  
語新憐鵲喜  
聲鄙惡鷗貪  
旅迹何時定  
歸心不厭南  
佳辰近燒燭  
盛事憶傳柑  
學業虛千卷  
生涯寄一庵  
誰能弔雙影  
無月不成三

集東坡詩贈程大本

十圍偏腹貯天真謀道從來不計身公業有田常乏食  
陶潛無酒亦從人異同更莫疑三語飢飽終同寓一塵  
待我南游載君去扁舟歸釣五湖春

曉起戲集東坡句二首

簾紋如水帳如烟一榻清風直萬錢困卧北窓呼不起  
老夫風味也堪怜

又

清風終日自開簾  
吏散空庭雀噪簷  
午醉醒來無一事  
地偏心遠似陶潛

秋興

鼓角邊城暮關河古塞秋  
淵明方止酒王粲亦登樓  
搖蕩傷殘歲棲遲憶故丘  
乾坤尚傾仄吾敢歎淹留

村行

墟落依林莽茅廬出短牆  
兒童避車馬父老饋壺漿  
半溼田新雨猶青棗未霜  
逢人問豐歉一一歎聲長

不眠

不眠披短褐曳杖出門行月近中秋白風從半夜清亂  
離驚昨夢漂泊念平生淚眼依南斗難忘去國情

秋晚書懷

蕭蕭霜秋晚荒荒塞日斜老松經歲葉寒菊過時花天  
濶愁孤鳥江流濶斷槎有巢相喚急獨立羨歸鴉

早起

曉起先烏鵲愁多竟不眠風霜嚴塞草星月淡秋天落



葉親攜帚垂瓶自汲泉禁門朝萬馬魂斷憶當年

春日

遲日回輕暖東風埽積陰客愁眉上見春意柳邊尋健  
犢躬畊計歸鴻去國心醉鄉如可隱會放酒杯深

庚戌元日

舊日屠蘇飲最先而今追想尚依然故人對酒且千里  
春色驚心又一年習俗天涯同爆竹風光塞外只寒烟  
殘年無復功名望志在蘇君二頃田

次伯堅韻

公道向來惟白髮浮生何處用黃金東風吹散三年恨  
春色驚回萬里心急景只教人貌改滄溟不放酒杯深  
異時儻及公榮酌準擬歸來卧柳陰

次韻飲嵒夫家醉中作

月中招得飲中仙草露吹風洒淨便地有溪山真可樂  
人如冰雪自無眠清新李白詩能勝勃窣張憑理最玄  
功業本非吾輩事此身聊復鬪尊前

晚登遼海亭

登臨酒面洒清風  
竟日憑欄興未窮  
殘雪樓臺山向背  
夕陽城郭水西東  
客情到處身如寄  
別恨他時夢可通  
自歎不如華表鶴  
故鄉常在白雲中

風雨宿江上

風雨蕭蕭作暮寒  
半晴煙靄有無間  
殘紅一抹沈天日  
溼翠千重隔岸山  
短髮不羞黃葉亂  
寸心常羨白鷗閒  
濤聲午夜喧孤枕  
夢入瀟湘落木灣

棣棠

閒庭隨分占  
年芳裊裊青枝  
淡淡香流落  
孤臣那忍看  
十分深似御袍黃

雪

蕪蕪天花落未休  
寒梅疎竹共風流  
江山一色三千里  
酒力消時正倚樓

苦竹

密葉脩莖雨後新  
肯因憔悴損天真  
清如南國紉蘭客

瘦似西山採蕨人

睡起

平生心性樂疎慵，多病追歡興亦空。  
睡起不知春已老，一簾紅雨杏花風。

楊花

來時官柳萬絲黃，去日飛毬滿路傍。  
我比楊花更飄蕩，

楊花只是一春忙。

此詩亦嘗載摘林集中，然子文集是其子特夫手錄，恐無悞收者，故從之。

道中

鳴鳩逐婦婦欲去燕子引雛雛不來樹底樹頭千點雨  
山南山北一聲雷

丙寅刑部中二首

世事邯鄲枕歸心渭上舟釁來無朕兆意外得俘囚忠  
信天堪仗清明澤自流藜羹猶火食永愧絕糧丘

又

幽囚四十日坐穩穴藜床縲紲元非罪艱難已備嘗全  
家音頓阻孤枕夢難忘會有相逢日牽衣話更長

二月十一日見桃花

鳴鳩天色半陰晴  
竹屋松窗老寸心  
閉戶不知春早晚  
桃花紅淺柳青深

志隱軒

家居瀟洒似江村  
花草侵階水映門  
元亮結廬山挂眼  
孔融好客酒盈尊  
肯教軒冕移心志  
未厭林泉入夢魂  
我亦平生倦遊客  
一廛無處問東屯

偶題

羨他田父老於農遠是莊西與舍東不似宦游情味惡  
半生常在別離中

馬御史定國 三十一首

定國字子卿荏平人唐中令周裔孫少日志趣  
不凡宣政末題詩酒家壁有蘇黃不作文章伯  
童蔡翻為社稷臣之句用是得罪亦用是得名  
阜昌初遊歷下亭以詩撼齊王豫豫召與語大  
悅授監察御史仕至翰林學士石鼓自唐以來



無定論子卿以字畫考之云是宇文周時所造  
作辨餘萬言出入傳記引據甚明學者以比蔡  
正甫燕王墓辨初學詩未有入處夢其父與方  
寸白筆從是文章大進自號齋堂先生有集傳  
于世

宿田舍

狂風作帚掃春陰投宿田廬話古今尊俎只如平日事  
干戈方識故人心淒涼一樹梅花發迤邐千門柳色深

天子蒙塵終不返酒酣相對泣沾襟

清平道中

棘林苦苣野花黃一馬駸駸渡漂陽別墅酒旗依古柳  
點溪花片落新香伏波事業空歸漢都護田園不記唐  
今日清明過寒食又將書劍客他鄉

登歷下亭有感

男子當為四海遊又攜書劍客東州烟橫北渚芰荷晚  
木落南山鴻雁秋富國桑麻連魯甸用兵形勢接營丘

傷哉不見桓公業千古遶城空水流

長相思

歷歷春陽被羣木白沙淺水明如鵲結廬聊可障雨風  
學道未能充耳目故人居紫翠傷枳籬日落青山長  
歲云晏矣不可見望盡楚天飛鳥行

客懷

結髮游荆楚勞心惜寸陰草長春逕窄花落曉烟深  
早惟祈雨年饑不問金三齊雖淡薄留此亦何心

招康元質

此生依著定如何不傍耕疇即釣蓑北阜平蕪隨鳥遠  
東湖新漲與天多詩成重墨題飛葉睡起輕芒踏軟莎  
猶有客愁銷不盡風軒茶竈待君過

雨晴離開化寺

澗谷流秋水樓臺入暮寒連城遭雨積一日得泥乾利  
劍青鯊室名駒白鐵鞍回頭棲隱地風樹響珊珊

秋日書事

南山悠悠去天尺，雀寒未晚爭投棘。  
野人籬落不勝荒，溪欲絕流堆亂石。  
小園蔬藥知有無，未免杖藜煩兩屐。  
霧蒙甘菊細莖紫，風動牽牛晚花碧。  
鄰舍翁歸竹几空，秋天日落松窗寂。  
小杯翻酒足自娛，閭巷浮沈真可惜。

讀莊子

吾讀漆園書，秋水一篇足安用。  
十萬言磊落載其腹，北風熟相梨冷日。  
照鴻鵠人生固多事，端坐至秉燭。

雪霽

金夕日  
卷一  
高巖旭日吐深蘋雪霽樓臺白玉京獨往南塘探春色  
枇杷花下竹雞鳴

寒食

燕泥半落烏衣巷柳色全添綠綺窗且伴丁香過寒食  
弄晴蝴蝶一雙雙

楊休烈村居

籬落牽牛放晚花西風吹葉滿人家閉門久雨青苔滑  
時見鴛鴦下白沙

游何氏園

八尺龍蛇薜荔牆，瘦松疎竹更蒼涼。  
梅花映水無人見，隔岸飛來片片香。

四月十日遇周永昌二首

竹裏涓涓雨未晴，日高窗牖受虛明。  
數家燕雀青雛出，是處園林綠穎成。  
貧覺酒盃真有味，病思丘壑豈無情。  
東山舊隱許相過，他日秋原看耦耕。

又

幼時種木已巢鷲猶向花前作酒顛郭外青山招曉出  
圃中明月照春眠世無蘇黃六七子天斷文章三十年  
今日逢君如舊識醉持杯酌望青天

過李湘

數樹高槐散乳鴉時於缺處見黃花涼風不斷如流水  
相對胡床坐日斜

雪

紅樓翠瓦不禁寒欲剪梅花去路難淨埽竹亭聊飲酒



恰如明月照金盤

懷高圖南

劉又一狂士尚得韓愈知君才百劉又知者果其誰三  
隨計吏貢躡屨游京師文章善變化不以一律持碧海  
涵萬類青天行四時去年高唐別河柳搖風枝今年清  
明飲高花見辛夷茲來又幾日軍檄忽四馳尺書無處  
寄相見果何期白日鬪龍蛇黃塵笳鼓悲春風獨無憂  
吹花發江湄一杯送歸雁萬里寄相思

送王松年之汶上

去去東平道飛轅不可攀地隣邾子國天近穆陵關問  
俗徵前事移家卜好山溪堂醉花月春興幾時還

香巖病中

九州四海盡行路萬戶千門非我家金彈不徒驚燕雀  
春雷終待起龍蛇

題崇子中庵

羨君高節似陶潛五畝園林老不添遯世人情雖淡薄

開門秋色自清嚴  
案頭黃卷香終日  
砌下蒼苔雨一簾  
後夜中秋更應好  
隔窗雲木看飛蟾

郢州城西

秋江白水浪花麤  
墟落人歸鳥自呼  
新月高城三百雉  
角聲吹徹小單于

送圖南

壺觴送客柳亭東  
回首三齊落照中  
老去厭陪新客醉  
興來多與古人同  
戍樓藤角垂新綠  
山店檉花落細紅

他日詩名滿江海  
齋堂相見兩衰翁

秋日書事

井邊薏苡吐秋珠  
舍下瓜區雜芋區  
世道未夷聊小隱  
不須辛苦著潛夫

村居五首

溪頭梅是去年花  
閒日初長逕竹斜  
向晚孤烟三十里  
不知樵唱落誰家

又

蠶蛹成蛾桑柘稀  
海棠花發照牕扉  
離騷讀罷無人會  
獨立溪南看夕暉

又

五月南風化蟪蛄  
野塘晚筍未成蒲  
榴花落盡紅英細  
沙渚鴛鴦半引雛

又

柿葉經霜菊在溪  
天寒落日見雞棲  
西家有客篋新酒  
紅葉蕭蕭蓋芋畦

又

歲暮行人竟不來  
空吟溪樹覓寒梅  
何時消盡關山雪  
收拾春風入酒杯

宣政末所作二首

蘇黃不作文章伯  
童蔡翻為社稷臣  
三十年來無定論  
到頭姦黨是何人

又


山杏山桃取次開  
紅紅白白上樓臺  
移將海底珊瑚樹

乞與人家也不栽



中州集卷一





總校官庶吉士臣侍朝

校對官庶吉士臣陳文樞

謄錄監生臣趙友彬